

W. Rosch



Band I

# Säksche Balladen

von Lene Voigt

## Lenore

Lenore sauste ausn Bätt  
Un fuhr in ihre Laatschen,  
Denn's schiener, als wenn eener tät  
Dorm Hause unten graatschen.

De Mudder aus dr Hammer schbrach:  
„Was mährschte denn am Fänster?“  
Lenore rief: „Ich guck' mal nach,  
Ich gloobe, 's gomm Geschbänster.“

„I geene Ahnung, dummes Gind.  
Was so ä Mädchen schlabbert!  
Im Garten draußen seifzt dr Wind  
Un's Bodenfänster glabbert.“

„Nee, nee, ach Mudder, 's muß wär nahen,  
Ich fürchte mich zu Dode!“  
„Nimm doch ä Schlickchen Baldrian  
Dort driem von dr Gommode.“

Da bläzlich heert Lenore, daß  
Ihr Name wärd gerufen,  
Un uff dr Dräbbe raschelt was  
Un dabbt sich nuff de Schtufen.

Lenore schleicht zum Gorridor,  
Ihr Härz globbt in Eggtase,  
Gen Himmel schteht dr Zobb ämbor,  
Galkweiß is ihre Nase.

„Wär is da draußen vor dr Dier?  
Welch schaurich Gast uns nahe?“  
„Gomm, siehes Bubbchen, effne mir,  
Bin Wilhelm, dei Soldate!“

„Du liechst! Mei Schatz där fiel bei Brag  
Im Nahgams mit ä Färde.  
Sei Freind, dr Emil Donnerschlag  
Grub sälwer'n in de Ärde.“

„Ruht ooch mei Balch am Frantischek,  
Das hat nisch zu bedeuten.  
De Seele schwang sich frehlich weg  
Zu Baradiesesfreiden.“

Drum gomm, mei Lorchen, riechle uff,  
Mei Flugzeich wartet unten,  
Mir gondeln jeh in Himmel nuff,  
Verlähm dort säliche Schtunden.

Un jeden Frieß, eh's häll dud sin,  
Bring ich zurück mei Schätzchen  
Un leech's hibbsch ins Bätte hin  
Uffs irdsche Schlummerblätzchen.“

Lenore schbrach: „Ich mach' schon mit,  
Doch mußte garantieren,  
Daß bei däm lustchen Himmelsritt  
Mir nisch — hm — dud bassieren.“

Un mit Brobäller-Raddadda  
Gings nuff ins Schterngefimmer.  
Dr Bedrus rief: „Da seidr ja!  
Geht links ins zweete Zimmer.“